



Шимлаң мир хоятат емаң хатл постадув

Там талдан Россия шимлаң мир хоятат ун кер тылаш хольмаңмет хатадан мет олаңпуш емаң хатл постаты питлат. Шци елпийн, мув доватан, аратал мират унт лор тылаш яртъяңмет хатадан туп постыдысат.

Хон мувеван нялъяң молтас шимлаң рут мир ул. Шцит элты рахал Правительства Постановлений ай кер тылаш 24-мет хатл 2000 талн. № 255 «О Едином перечне коренных малочисленных народов Российской Федерации» хоца луңатты. Шций артан Овс, Шцпар па Халэват Пелак мират лоңман улдат. Шци тумпийн Карачаево-Черкесской республика хоца улты абазинат па Ленинградской область хоца улты водь рут мир рахал каңалаты.

Емаң хатл шцишан шци верса, ванты ин кашң хатл элты вантман, ясаң уятты хоят шимла йил. Ант рахал ястаты – ясцев ушал. Лув ханшам нэпекатан, нэхты хоратан ул. Ал потарты хоятэв шимламал. Ямал мувеван ясаң тайты хоятлув касадман яңхлат, йис ёх улапсаев елды тулат. Шци веран ясцев, улапсаев ант хурлал. Елды улмитал.

Там постама емаң хатл онтасан, муң ханты мирэв кушкеша па верытал лув элтайл потарты, хорасал альты. Вератты тус ёхлув па нэңлув



Хор: ЈДА архив

хорамаң пормасаң вантопсайт пуншилдыты. Кушайлув, волаң уйтантопсаятан, еңта пасан суран ясаң вуйдыты, хоты там хатлатан ханты мирэв ул па муй хорпи нётотсайт мослат.

Мосванан профильной департамента па Законодательной Собрание хоца лоңам хоятат касдыман па худ велпасдыман улты хоятат хоца яңхты питсат.

Шци веран, нын куртана, муй нопталты панана кушайт ки ёхатлат, потартаты, муй нынан улапсайн ямашак верты ураңан мосмитал. Ванты, муң улапсаев туп муң элтаев дойл. Муң ки нэхаты ант питлув, нэмолты па миран ант нэхтадаюв. Ищи лотэван хащлув.

Ям номас елды понты мосал. Антом туп йи хатадан ултыя. Овращлув па щацилув щунаң

улапса елды тутыя. Няврэмлува потарты па альты, муй хорпи волаң па уйтаң хоятат ханты мир кутан улдат. Муй хорпи монцат, арат, амааматщет тайлув. Кашң хоятэв, кушкеша лув верытталд кеман, щём па номас ки понал – шци порайн юшев ант сохнамтал, овев ант пентамтал.

Аллина Тоярова ханшам потар



Хор: ЈДА архив

Нётап арталаты ураңан



Хор: ЯНАО губернатор пресс-служба/Александр Тесленко

Ун кер тыдац кутап хатлат элты, хоятата нётапса вер тугы департаментатан рупитты куцайт тац хотатан касалты па вой-хул велпаслаты ёх хоца, хотата, куртата яңхты номас понтсат. Тамац уйтантопсайт, Ямал мув куцаев партапса хуват, худмет тал верты пйтсайт.

«Анта вошан удман, хошам хотан омасман, хоят нын хоцайн ёхатад. Нын ши, рупитты хоятат хоца ещадт мандаты. Порайн, муй хорпи турама хатл идпийн ёх рупитлат, нын сёман вантладлан. Даварт рупатаел верман, муй арат юр па щём понлат, моштадты. Хоты улапсаел манал, кацадалты. Хоят шошия улты, рупитты тахаялан потрал туңа манал. Ёхтам куцаая торды ястал, хота муй вер туңматты мосал, муй даварт ул па кен ураңан, муй верты мосал. Анта палвош хоца хойдыйм ясаң хуват, нын сёман вантам щиран рупатайн елды тувалан», – округ куцаев Дмитрий Андреевич Артюхов лаңкар куцайлад педа вер щир ясаң тус.

Ямальской парламент куца ху Сергей Миронович Ямкин, юша акташам лаңкар куцайт хоца,

яңхты сус, оха понман ул. Мет олңа лув ур муват педа мантсат, щита ванты, холна ищки па касалты ёх холна йи лотан улдат. Щиты хоятат пилан потрэмиман, хащам районата па ёхтыдылат.

Тамиты яңхман, лув лэрашдэл, хота муй хорпи нётапсайт хоятата мослат. Вер туңа-щира карлаты ураңан, мосаң рупата па щиран кератты мосал. Хота ох нётапса верты, мосаң па пормас щиран нётты.

Тунаяд яңхмел порайн, ветсот молтас хотгэл пилан, хольмаң педа кат уйтантопса тыйс. Яртъяң сот туңматты партапса акатсат. Юхат, ши актам партапсайт «Дорожной карта» дыпия ханшсайт па ялап нётапса верат лэщатсайт.

Рупата вер тамиты тувман ныла, хоты доңалтам нётапсайт хоятлува кен тулат. Молты нётапсайт мосаң ялпа па вердайт. Тац хотатан рупитты, вой-хул велпаслаты ёх, нын па пуңадан лойман ал хащаты. Муй нётапса мосал, хота вер ёвра манал, иса ястаты. Елды улты улапсайн па рупатайн кен верты ураңан, нын элтан ясаң давалда.

Лапат щёрас арат лутасты нэпек маса

2023-мет тал элты, округ куцаев партапса хуват, няврэм сёма питты порайн, «Малышу Ямала» мойлапса дарац тумпийн, лутасты ох нэпек лэщатса. Нётапса вер рупитты пйтмад вуш элты, няврэм сёма питты порайн, тампуш лапат щёрас тамац ох нэпек ақкет ёша пайтсат.

Мойлапса нэпек мет ар Новый Уренгой, Ноябрьск па Надым вошатан ортса. Лапатмет щёрасаң нэпек, Ноябрьск вошан улты руц ими Анна Милованова, ёша пайтас. Лув худмет похал сёма пйтмадан ар няврэмаң хотгэл щира луңтасты пйтсат.

Муй щиран тамац нэпек ёша пайтты, Мария Мартьяновна Лонгортова пилан потрэмисам. Лув худам эви тайл.

«Кимет, худмет няврэм сёма питтыйн, ялпа щимац дарац ант вуты ураңан, ох нэпек

вуты рахал. Щит ураңан, худмет эвем сёма пйтмадан, ох нэпек вуты кашащсам.

Няврэм сёма питты юпийн, нэм нэпекат лэщатты мосал. Ши юпийн «Мурах» карта хуват ныла, хун нётапса ох ёхатад. Юхат, телефон хуват, сох лапкаятан мосты пормас пирыда па сертификат охан сохаштантыда. Лутасты лапкайт, кен ураңна, посан понман улдат. 2025-мет талдан, сертификатан нялъяң педа лапат щёрас солкува арат ох ус. Тампуш еша эдатса.

Там йисан, электронной щиран лутасда па, лутам пормасат почта хуват курта тулайт. Воша яңхты ант мосал. Ма нумастэман, няврэм тайты ақкета тамац нётапса шеңк ям вер», – Мария ястас.

Арсыр нётапса верат МФЦ, социальной зацита па Госуслуги хуват вантты па каншты рахал. Нынан миталам нётапсайт ёша пайтапталан.

Рут мир сох эталтаты касапса

Мир доватан улты арсыр рут хоятат кутан лапатмет пуш хораң касапса манал. Там хор эталтаты касапса «Ақкет па няврэмат рут мир сохан» нэматман ул. Хон мувеван улты арсыр рут мир верат тугы агентство там касапса вер тул.

Там йисан, улапса сора манты кутан, ялап мутрайт элдат. Энамты няврэмат йи щира луматдылат. Рут ясцелан ант потарлат.

Муң Хон мувеван тэдыя арсыр мир ёх ул. Кашң хоят лув опращдал рут мир сохат эталтаты ураңан, тамац касапса вер верса.

Щаха тый китам рупатайт интернет хуват вантты рахал. Ши тумпийн, хорат вантты нэпека па лэщатдайт. Тамиты похла актам рупатайт ант ушлат. Ар тал хащты юпийн, хорат хуват ныла, муй рут мир улапса щирад шависды, маты отат па ушсат.

Хор эталтаты касапса, щёхар тыдац хольмаң педа ветмет хатл унты рупатайт китты рахал. Ветъяң нох питам па рупатайдал постама катсот хоят мойлаптада.

Ши тумпийн, тампуш, холна кат номинация верса: «Рут ясаңан арыты ай няврэм апиты ар» па «Рут мир як». Там касапсаята ай тахайт потты тыдац хольмаң педа ветмет хатл унты заявка нэпекат давалдайт. Арыты хоятат кутан хус нох питам па ветъяң постама рупата пирыда. Нёхты хор щиран як китам хоятат кутан яң па хольмаң педа вет хоят мойлаптада.

Нох питам хоятат, мойлапсайн катлаптаты ураңан, Москва воша вохдайт. Хой тохи ёхатты ант верытал, электронной щиран мойлапса нэпекан китла.

Касапса пилтацты ураңан www.ethno-photo.com там электронной сайт хоца айкед луңатты рахал.

Ханты мир хорам луматты сохлув, арлув, яклув эталтаты ураңан, там касапса пилтацияты. Мир доватан ат уйтлаюв.



Хор: Зоя Куртямова

Сорнең ёшаң ханты леккар

Леонид Гаврилович Куртямов Љорвош районэвн, Ямал муевн па Хон муев доватн яма уйтла. Љув ултал хуват хоятат яммалман леккара рупитас. Тампуш, 29-мет хаталн ун кер тылацн лүв сэма питам хатл постаты питал. Љув 75-мет тала цци ванамал.

Љув хорамаң па щуняң Щаня мувн сэма питас. Ащел-антел вулэң тащ хотатн яңхсаңан па худ велман рупитсаңан. Хун Леонид Гаврилович ашкуда етшаптас, нумасты питас: холта манты, рупитты, мосаң елды уталтыты. Щикуш ащелан ёхи хащты, вулэт пидан рупитты, партыдыса. Љув па кимет ям номас понылдыйс: «Антем па ащем ая ант йилат, пирщаматы питсайт. Щиты леккара уталтыты манты номас понтсам. Уталтыты мантсам».

– Ашкуда етшам юпина, муң лухаслүв пидна, Тюмень воша мантсув. Мет олңа нумассам, мосаң няврэмат касты уталтаты хоята манты, мосаң мув дыпи вантты хоята па геолога питты. Антидам нумалмасдам па так номас понтсам, леккара елды уталтыты манты. Щи порана муң шоши ханты хоятлүв кутн шеңк ар леккар антом ус, – Леонид Гаврилович ястас. – Уталтыты етшасам па мохты ёхи йисам. Мет олаңн кат тал хоят лов муш яммалман рупитсам. Щи порана Ямал муев доватн артан ялап вошат па куртат омпсантты питсайт. Ар тахаят элты арсыр рут хоятат хотат верты ёхатсат. Рупитман, хоятат хой порайн, мушмалтысат. Атаң-хатл мушаң хоятат хоца па леккарат пидн яңхсув. Љувилал тумтака павтыдыслүв. Мет лавартаң кашаң хоятат Пулңавта

дов тайт соращак тумтака йилат. Ёвра энмам довт цци мутрайн туңа-щира ияха рахты па айтаты рахал.

– Кашң хоята лүв рупатайл туңа-щира уйтты мосал. Щи порайн рупатаен яма манал. Леккар рупата хоца кашды па вевтама рупитты волды ант рахал. Ма рупатаем хуват арсыр мувата уталтыты яңхсам. Кашң тал, иевн, хоят яммалты ялап щир этал, щит иса уйтман па нумман тайты мосал, – Леонид Куртямов нумасман потарал. – Ин па камн хорпи мутрайт, компьютерат нётлат хоятат тумтака паватты. Велци рупитты ай леккарата ици нётты мосал. Рупатаел верман элты вантман альты мосал. Хота ям ясаңан, хота вер эталтаман мосал энамты ёха нётты. Щиты лүв уталдат па самаңа елды рупитты пилдат.

Леонид Гаврилович рупитмал хуват ар хоят тумтака павтас. Вет щёрскем операция верас. Нялъяң тал Пулңават ун леккар хотан рупитас. Тэлыя пумащипа ясаң леккаре в кеша, ханшман улда.

Леонид Куртямов – «Отличник санитарной обороны», «Заслуженный врач РФ» па «Почётный гражданин ЯНАО» нэмат тайл. Љув дохан ай пора элты холна хухатдыйл, ухаң шоппи наварты хошал. Щи тумпина грекоримской па вольной пертащты щирн Тюменской область доватн арпуш мойлапсайт щитыдыйс. Ямал мув

доватан Овс мув шимлаң рут мир каспсайн ици олаң мейстайт вуйдыйс. Щи ураңна лүв Олимпийской касты вер хоца «Сочи-2014» ущитам тут нядам туты пирыса.

Ин лүв пенсияйн ул па ал щиты ант омасал. Энамты леккарата пора-порайн нётал хота ясаңан, хота веран. Кашң лапат дохн хухатдыйл па касты дойдыйл. Энмам куртала яңхилыйл. Хул па вой велты яңхал.

Ар яма рупитам ураңна па сэма питам 75-тал кеша Ямал муев кущайт элты мойлап ясаңан китла. Елды лувел тумтака улты па ям верат елды туты. Щимащ умащ шоши хоятат онтасан муң ханты мирэв хувтан мир доватан уйтла!

Иван Сандрин ханшам потар



Хор: vk.com/arctic_narod

«Заведующему отделению травматологии Леониду Гавриловичу Куртямову:

Леонид Гаврилович, спасибо Вам за наши ноги. Здоровья и всех благ.

Очнулся – гипс. И, как назло, стрельнуло левое плечо.

Боясь теперь идти в больницу. И жизни новую страницу

Мне там придётся открывать. Совсем не нужно унывать!

Есть день врача, и мой совет – Беги скорее в кабинет!

Ведь чудо есть, и есть они – Родные травматологи.

Спасибо! На ноги подняли. Без Вас бы мы совсем пропали!

Мы Вас сердечно поздравляем, Хороших графиков желаем!

Пациенты палаты № 360:
Лапгандер Н.Х., Лапгандер С.М.,
Черкашина З.С.»



Хор: vk.com/arctic_narod

тутдысайт. Щита муң ун операцияйт версув.

Хун ёш па кур лов шука тохл – щит мет лаварт туңа-щира паватты па яммалты. Щишн, лүв ялап щират каншты питас, хоты соращак мушмалтам довт ияха акатты па ханалты. Мир доватан уйтты ун леккар, Илизаров нэмпи карты ющатн, шукадам довт ияха пуватты питас. Щимащ мутра пидан хоят кур-ёш



Овс мув касапса хон мув доватан

Ун кер тыдац одаң лапатан, айдат ёх 16-17-мет тал эвиет па похиет кутан, Первенство России нэмпи верам касапса етпас. Сахалинской область хоца хон мувев доват элты 100 молтас хоят уйтантыйс.

Талаң лапат сыс ар муват элты ёхтам айдат ёх лув кутдалн кассат. Камчатской, Хабаровской па Красноярской мув сыл, Магаданской па Сахалинской область, Якутия, Чукотка, Югра па Ямал муват элты хоятат Южно-Сахалинск нэмпи воша ёхтыдысат.

– Сахалин мувн муң кимет пуш актац-сув. Одаң, 2021-мет талн 14-15-мет тал доват няврэмат кутан муң ищи Первенство России верыдысув, – Федерация Овс мув касапса Россия доват куца ху, Алексей Ворошилов, айкел верас. – Касты лотдал шеңк яма лэцатман улдат. Муң нумастэвн, ешаул там тахайн, ун хоятат ураңна ищи тата касапса верлув.

Овс мув шимлаң рут мир касапсайн лув вет щирн юрац-сат: хулам пуш навармиман, ятапца пилн хулам километра хухадман, дайм воцкиман, тынщаң ёвалман па ухаң шоп-пи наварман.

Там касты лотан, 10 комплект мевал посат ураңна, энамты ёх юрдал эталтасат. Мет ар – 24 хоят Югра мув элты тохи яңхсат. Ямал мувев элты 14 хоят ус: 1 куца, 2 судья па 11 касты айдат ёх:

6 пох па 5 эви. Ханты няврэмат ищи лув юрдал поныдысдал. Щит 2 эвие – Анжелика Лонгортова па Эвилаина Пугурчина Овкурт элты. Катңан вулэң хотгэл ёх элты улдатан. Ин ацидал-антидал вулы ташдал пилан Кев уншты лэцатылат.

– Ма тамац ун касты тахая ведщи яңхсам. Шеңк хува, па мува ищи ведщи тутдысайм, – Эвилаина Пугурчина ястас. – Ма опем, Ксения, «Мастер спорта» нэм тайл. Лув пелайл вантман, ма ищи касты тахаята яңхты питсам.



Хор: Эвилаина Пугурчина



Нумастэмн, елды холна ямашак юрацдам, одаң местаят ищипа шитдам.

Пилдэңал, Анжелика Лонгортова, ятапца пилн хулам километра хухадман 3-мет места шитмал. Щиты лув норматив щирн «Кандидат в мастера спорта» нэм унты этмал.

Ханты эвилув юр понман Ямал мувев яртгяң команда элты 3-мет тахая этсат. Югра мув элты айдат ёх кимет места вусат. Республика Саха (Якутия) элты касты хоятат нох питсат.



Хор: Эвилаина Пугурчина

Таксар касты хоятат



Хор: Алексей Михайлов

Тампуш, ай кер тыдац 18-19-мет хатлатан одаң этап «Северной характер» нэмпи касапса пуншса. Одаң ят нэмал «Тал», щалта елды питдат – «Тови», «Цуң» па «Сус». Тамац касты лотат лапатмет тал вердайт, хота юраң па таксар касты ёх лув кутдалн касдат.

Там «Тал» нэмпи ят Губкинской вош хоца лэцатман улмал. Щи тахая 95 командайт ёхтыдымел. Хоят щирн – щит 1500 молтас хоят. Хой хоты лэцатымал, щиты няд катего-

рия верман ус: «Профи», «Любители», «Новобранцы» (16-17 тал) па «Базовый уровень».

Лорвош район элты касты хара юраң хоятат ищи яңхсат: Артём Петров, Алексей па Алла Михайловңан. «Любители» категория щирн, 5 километра лонц хуват хухадман па арсыр усат-лотат элты наварман, 3-мет места шитсат.

Щи тумпина, атэл касман, нэңат кутан Алла Михайлова кимет места вуймал. Ийикел па, Алексей Михайлов, худмет местая ханапмал.

Муң нумлэв...

Дорвошан, ун кер тылац кимет лапат соханты хатадан, 70 молтас хоят дохан хухалты дойдысат. Щи касаспа, нэман, Антон Антонович Рохтымов шуңат кацтыты ураңна лэцатыса. Лув СВО ляль хоца солтана ус. Лыдңат улмалн шеңк самаңа дохан хухатдыс.

Антон Рохтымов, 3-мет хатадан Ас потты тылац 1989-мет талн, Дорвошан сэма питас. Щи куртадан ус па энмас. Дорвош ашкуда 11-мет класс унты уталтыс. Лув ай пора элты апраң па каркам няврэма ус.

Ащелан касты тахаята патан иса тутлыса. Щиты лув, олаң классат элты па ашкуда етшаптаты унты, арыр касасаята яңхас. Кашң тал, ашкуда элты район па округ ловата касты китыдыса. Хой порайн Ямал мувев элты па мувата яңхас. Яма касты ураңна, 2007-мет талн, Дорвош район апраң энамты ёх кутан «Любительской спорт» номинацияйн нох питас.



Касаспа тумпина лув арыты па якты каш верты лотата ищи яңхидыйс.

– Няврэмдам кутан, Антон олаң па мет ун похием. Лув манэм шеңк яма нётас, ащилад элты вантман хащилдыс. Щутцаты хатлатан муң, ийикем шуңат па похдам пилан иса унта яңхидысув. Щита шай йинцсув, лэтот кавартысув па касасаята лэцатысув. Похдам ар духас тайлат, лув ищи муң хоцаев мойңа ёхтылдыдат, – антел, Людмила Тимофеевна Рохтымова, ястал. – Луң сыс унтан рых па толах актыдысув. Ин утдам щиран похдам

ходна щи унта яңхлат, хул веллат, вой тулат. Ма нума-стэман, мин няврэмдаман яма энмалсаман.

Ашкуда етшам юпийн, елды уталтыты номас понман, Антон Пулцавта манас. Лув щита Ямальской многопрофильной колледж хоца тутаң хопат сэвс тайты хоята уталтыс. Щи уталтыым щирал щирн елды рупитты питас. Кев сыд район Охсар вошан «КС» нэмпи тутаң хопан рупитас.

– Ун похием ашкуда етшам юпина мохты солтана тутлыса. Северной Осетия мув Моздок нэмпи вош хоца 2008-2009-мет талатан ус. Отделения хоца командира



Хор: Людмила Рохтымова

побыдыса. Младший сержант нэм тайман ёхи ёхтас, – Людмила Рохтымова потартал. – Ин хун СВО нэмпи ляль айкел этас, каркам похием нумасас па ищипа нэпек ханшас мувев аратыты ураңна. Сусан 2024-мет талан манас, кат тылац уталтыс па ДНР «Атлант» нэмпи 3-мет мотострелковой бригада хоца китса.

Ван хатлап тылац 29-мет хатадан 2024-мет талан, Донецкой Народной Республика Красноармейской район Пустынка нэмпи вош аратыман, солтанэв мушмалса па антома йис.

Антон Рохтымов хулам похал – Фёдор, Илья, Севастьян – ищи каркама энамлат. Похлад нэм олаң буквайт элты «ФИС» позывной лувел юкантас. Антон Антонович лув похлад лыпийн елды ул, елды дохан хухатдыман касал... Лув куртаң хоятладан нумла. Талта елды, лув урңала юкантам касаспа кашң тал лэцатты питла. Муң па ищи нумлэв па ант ёрэмалэв...

Иван Сандрин ханшам потар

ОБЪЯВЛЕНИЕ

Там QR-код хуват доңаты па вантаты, муйсыр нётосайт СВО хоца улты мохета мадайт. Щи тумпийн нэңдала, няврэмдала, аңкидала па ащилада ищи нётоса вуты рахал.



СЛУЖБА ПО КОНТРАКТУ В ВС РФ

ПОЛНАЯ ИНФОРМАЦИЯ ПО ТЕЛЕФОНУ
+7 (902) 816-11-90
+7 (34922) 3-98-08
ЗВОНОК ПО РОССИИ БЕСПЛАТНЫЙ

ВРЕМЯ ДЛЯ ВАЖНЫХ РЕШЕНИЙ!

КОНТРАКТНАЯ СЛУЖБА
6 700 000 Р
ЕДИНОВРЕМЕННАЯ ВЫПЛАТА
4 000 000 Р

ПРИ ЗАКЛЮЧЕНИИ КОНТРАКТА НА ЯМАЛЕ

Обучение:
✓ ОПЕРАТОРОВ БЕСПЛОТНЫХ ЛЕТАТЕЛЬНЫХ АППАРАТОВ
✓ ТАКТИЧЕСКАЯ БОЕВАЯ
✓ МЕДИЦИНСКАЯ ПОДГОТОВКА

3 600 000 Р ЕЖЕМЕСЯЧНЫЕ ВЫПЛАТЫ ПРИ НАХОЖДЕНИИ В ЗОНЕ СВО
400 000 Р ДО 120 000 Р ОТ 225 Т.Р.

Сорашак айкел моцатты ураңан

«Лух Авт» газета кашң лапат йи пуш этдыл. Тухал ишан, ёхаттал унты талаң лапат хащал. Щи веран, сорашак айкедат моцатты ураңан, нынан мосал «Лух Авт» побыдыты айкедат «ВКонтакте» па «Одноклассники» хоца моцаттыты.

Щи ураңан там QR-код мохты доңаты, па муң верыдыты айкелдува ханшлтыяты. Кимет веран, айкел луңатты тумпийн, щита рахал ясаң ханшты, потран сама ки рахас – пос понты.

Муң па, нын вантам айкелдан элты ищи нопсэв тыел-тохел побылдылэв, вантлэв – мата айкедат па муй элты хоятат луңатты лаңхалат.

Тумтак ёшна, тумтак курна ханты мир улапсаев ияха понасман елды тулэв, ханты мир ясцев шавилэв!



Тови ёхтас, хошам тус

Каман товия йис. Хув тал сыс няврэмат иськи хатлат элты марэмасайт. Там лопасан тови элты потрэв тулэв. Муй тови муңева тул, муй хорпи тылсыт тайл, муй товийн тыйл, муй хорпи емаң хатлат улдат.

Иськи пора етшас. Овс мувеван товев ун кер тыдасян ар хорпи: йи хатл донсял додал, кимет хатадан ерт донсь пи́дан манты верытал, худмет – ись-

кия па вотаңа йил. Тови пи́дан хошам хатлат ёхатлат, няврэмат аматлат.


Си порайн улты мувев ял-пилыйл: донсял додал, мув лотат этлат. Хошам муват элты олаң щипкет – кер щипкет, ворңайт ёхатсат па сыйлад сясьты питсат. Ешауд шуват поханлат, вой пошхат сэма питлат, еңк манал, лытат этлат па улты мувеван мет хошма йил.



Хор: Альбина Тырлина

Хорат хуват потар лэсятаты

Муй товийн улдыйл? Хорат етшаптадан па потар тови элты лэсяталан.



Хор: Зоя Курьямова

Инсясапсайт

1. Муй хорпи тови тылсыт уйтлаты?
2. Тал юпийн, муй пора ёхатал?
3. Муй хорпи турам хорас тови тайл?
4. Маты тылаңан еңк нопатла?
5. Муй хорпи тови емаң хатлат уйтлаты?
6. Тата туп тови элты ханшам ясаң шупат пирьядан.

- Донсь додал;
- Каман тарм иськи;
- Хошам хатлат ёхатсат;
- Тохлаң войт хошам мува манлат;
- Хойм лытат;
- Унтан вонсямотат пошсат;
- Шуват поханлат.



Хор: Альбина Тырлина

Тови пора элты муй уйтдан?

Кроссворд хося ясаңат лэ-рапты мослат. Там ясаңат хуват моштаты, муй элты щипкет арылат.

1. Товийн вой ... сэма питлат.

(лэхшоцц)

2. Тал сыс ... ар, товийн лув мохты додал.

(пшоцц)

3. Хошам хатлат ёхат-ты порайн, юх нуватан ... поханлат.


(лэвлуцц)

4. Овс муван ... сэма питал.

(эишэцц)




Хор: Иван Сандрин



Хор: Зоя Курьямова

Тови ёхтас

Там хорңан точкайт хуват етшаптадан па оляптадан.



Хор: Альбина Тырлина

Щацем монцат



Хор: Илья Михно

Хув йис порайн ханты па охаль ёх нэпек ханшты ант хошсат. Щишан ар монц уйтсат. Пирац хоятат монцдал эвилала-похлала потармел. Ёый па хидыдала-хилнэдала ястамел.

Там йисан щи монцат муёва щи монцдайт. Щитат номпса понтсаллув. Ин ялап ясаң, ялап потар, ялап монц этас.

Монц потар – хув потар. Тухал монц веткем ат монцда. Щит вой монц, Ёон верты ими монц. Ас кимадан улты хоятат Асёл па худат элты монцдат. Унтан улты хоятат унтатан улты войт, унтаң ёх элты монц потардал мандат. Вулэң ёх па вулыдал,



Хор: Илья Михно

касақты юшдал па лув улапсаел элты монцдат.

Тата «Щацем монцат» луңатты нэпека понам монцқан луңталан.

Нялмаң Охсар ики

Охсар ики ул. Воцкам курт вол элты тонты пелак тус. Щалта па мойпар ики, ай войт па шоврат лув хоцайд улты вохсалды.

– Манлув, – ястал, – ма улты тахаем сорам. Нын хоты, ин щи амардалайты, тата щи амардалайты.

Щалта мохилад лув хотада щи тусды. Мойпар икел хот патыя манты партсалды. Ай войдал па шовардал ов пуңалан улты партсалды. Ултэл сахат, ай войдал па шовардал айнайн дэты питсалды.


Мойпар икедан инщасла:

– Муйдан щита лухалдан?

– Самем вохла, сулдам ким караласдам, щитдам дэлам. Наң па вунтар олцен элты сулдан ким талалан па дэва.

Ин Мойпар ики сулдал ким талдалды па хонша щах раканал. Олмайң охсар ики мойпар икел ищи ёхи дэсды. Щи.

Хор: Иван Сандрин



Ики па нянь дант



Хор: Иван Сандрин



Хор: Иван Сандрин

Ики атэлт хотан ус. Ипуш нянь дант рувтас. Нянь дантал кур шанша омассалды. Ёув па ил олас.

Имолтыйн нянь дантал нох элдас па путал элты ил эпатты питас. Ин ики олам сахат худантыйл, кур шанш пелакан амуй шиңхартыты щацал?!

Самал манас па кимды педа хухалмас. Нумасал: «Амуй хойн ёхатсайм?».

Ким мантал сахат молщан понал ован лап пентсалды. Щалта па щитал талман нумасал: «Амуй хойн катадсайм?».

Талтал элты, молщан понал хол тохнамтас. Пакнам икев ванан улты лухсал хоца наврас. Ястал: «Хот лыпеман амуй щацал». Лухсал пидан сора тохи манапсаңан. Щит нэш нянь дантал ил эпатмал. Щи.

Сот тал нялмет шупев постасэв



Хор: Альбина Тырлина

Там волаң емаң хатла округ хуват АНО «Ямал-Медиа» хося рупитты хоятат яха актыдысайт. Айкедат туты ёх уталтасайт, мойлаптасайт, пасанан опсыдысайт. Ханты газетая потрат китты хоятдув Ёмвош, Муравленко па Пулцават вошат элты ёхтыдысат. Рупатаев туңматты ураңан, лекцияйн луңатсаюв, мастер-классан альсаюв. Ханты хоятдув ешал филологической наука кандидата улты, прикладной исследований па разработок Обско-угорской институтан Белоярской филиалан фольклорной центрэн кусяя рупитты нэ Римма Михайловна Потпот кат хатл ясаң тус. Рут ясең, ханшты верат, арат, монсят, емаң хатлат элты потартас па муңев уталтас. Ситумпийн, Римма Михайловна холна вош ханты хоятдув пидан ар тахаятан уйтантыйс па ясең элты потартас.

Емаң хатадан кашң ханшты хоят ар хошам ясаңан ястаса. «Дух Авт» газетая потрат китты нэңдув: Галина Пенчакувна Кечимова, Людмила Тихоновна Гурьева, Юлия Николаевна Накова Лилия эвел пидан мойлапса ясаңан ястасаюв. Юлия Николаевнайн аран арэмасаюв.

Людмила Тихоновна «Дух Авт» газетая «Ханты ясаң» па «Луима сэрипос» газе-

Ун кер тыдась ярхусмет хатадан Ямал муван ханшты, нёхты хор верты, радио хося рупитты хоятат емаң хатлэп постасэл. Рут ясаңан ханшты хоятат ураңан там тал мет волаң. «Красный Север» па «Няръяна Нгэрм» газетайңан 95-мет тада йисңан, «Дух Авт» – 25-мет талап постас.

тайңан элты мойлапсайн мойдасды па ишакты нэпекан юконтсалды.

Каматса ясаң си нэпек элты пондам: «Дух Авт» газета сэма

питама хатлал ёхтас – хус вет тада ювмал! Па ищиты щи, соткем тал елды ула, щуня энма мира амат тувман! Елды ищиты щи яма па апраңа ру-

питаты, ям па мосты айкедат, потрат, умащ моншат, арат ханшаты! Ванта, кашң куртан па кашң хотан ханты хоятат газета лавадат».

Сот тал элты нялмет шупев постасэв. Ханты улапсаев, щирдув-пищдув, ардув, монсдув онтасан газетаяв ул. Ситы си, елды педа, хол яха рут ясеңев тулэв па шавилэв.

Альбина Тырлина
ханшам потар



Хор: Жанна Ковязина

Газета «ДУХ АВТ»

Адрес редакции: 629003, ЯНАО, г.Салехард, мкр. Богдана Кнуянца, д. 1, каб. 106
+7 (34922) 4-68-63

E-mail: luh.avt@yamal-media.ru

Учредитель

Департамент внутренней политики Ямало-Ненецкого автономного округа (629008, ЯНАО, г.Салехард, пр-кт Молодёжи, д. 9, каб. 708)

Газета зарегистрирована Управлением федеральной службы по надзору в сфере связи, информационных технологий и массовых коммуникаций по Тюменской области, ХМАО-Югре и ЯНАО 19 апреля 2012 года
Регистрационный ПИ № ТУ72-00558

Тираж 1300 Заказ 127 ТЗ
Подписные индексы: на год – ПА700, на полугодие – ПР561

№ 17 (1320)
Газета вышла в свет 25 апреля 2026г.
Подписано в печать 23 апреля 2026г.
по графику: 16.00
фактически: 16.00
Газета выходит по субботам

Цена годовой подписки 88 руб., в розницу не распространяется

Издатель

Департамент внутренней политики ЯНАО (629008, ЯНАО, г.Салехард, пр-кт Молодёжи, д. 9, каб. 708)

Отпечатано в АНО «Ямал-Медиа» Юридический адрес: 629003, Ямало-Ненецкий автономный округ, г. Салехард, мкр. Богдана Кнуянца, д. 1, каб. 106
Фактический адрес: 629007, Ямало-Ненецкий автономный округ, г. Салехард, ул. Чубынина, д. 39А

Генеральный директор АНО «Ямал-Медиа» Зулинова Марья Андреевна

Главный редактор Яковлева Аллина Кирилловна